

Missa latina

RITUS INITIALES

Populo congregato, sacerdos cum ministris ad altare accedit, dum cantus ad introitum peragitur.

INTROITUS

Cantu ad introitum absoluto, sacerdos et fideles, stantes, signant se, dum sacerdos, ad populum conversus, dicit:

In nómine Patris, et Fílii, et Spíritus Sancti.

Populus respondet: **Amen.**

Deinde sacerdos, manus extendens, populum salutat, dicens:

**Grátia Dómini nostri Jesu Christi, et caritas Dei,
et comunicatio Sancti Spíritus sit cum ómnibus vobis.**

Populus respondet: **Et cum spíritu tuo.**

Deinde sequitur actus paenitentialis. Sacerdos fideles invitat ad paenitentiam:

**Fratres, agnoscámus peccáta nostra,
ut apti simus ad sacra mystéria celebránda.**

Fit **brevis pausa silentii.**

Postea omnes simul faciunt confessionem:

**Confíteor Deo omnipoténti et vobis, fratres,
quia peccávi nimis
cogitatióne, verbo, ópere et omissióne:**

et, percutientes sibi pectus, dicunt:

mea culpa, mea culpa, mea máxima culpa.

Deinde prosequuntur:

**Ideo precor beátam Mariám semper Vírginem,
omnes Angelos et Sanctos,
et vos, fratres, oráre pro me
ad Dóminum Deum nostrum.**

Sequitur absolutio sacerdotis:

**Misereátur nostri omnípotens Deus
et, dimíssis peccátis nostris,
perdúcat nos ad vitam aetérnam.**

Populus respondet: **Amen.**

V: Kýrie, eléison. R: Kýrie eléison.

V: Christe, eléison. R: Christe, eléison.

V: Kýrie, eléison. R: Kýrie, eléison.

Deinde, quando praescibitur, cantatur vel dicitur hymnus:

Glória in excélsis Deo

et in terra pax homínibus bonae voluntátis.

Laudámus te,

benedícimus te,

adorámus te,

glorificámus te,

grátias ágimus tibi propter magnam glóriam tuam,

Dómine Deus, Rex caeléstis,

Deus Pater omnípotens.

Dómine Fili unigénite, Jesu Christe,

Dómine Deus, Agnus Dei, Fílius Patris;

qui tollis peccáta mundi, miserére nobis;

qui tollis peccáta mundi, súscipe deprecatióem nostram;

qui sedes ad déxteram Patris, miserére nobis.

Quóniam tu solus Sanctus, Tu solus Dóminus,

Tu solus Altíssimus, Jesu Christe,

cum sancto Spíritu: in glória Dei Patris. Amen.

COLLECTA

Quo hymno finito, sacerdos, manibus iunctis, dicit:

Oremus.

Et omnes una cum sacerdote per aliquod temporis spatium in silentio orant.

Tunc sacerdos, manibus extensis, dicit orationem; qua finita, populus acclamat:

Amen.

LITURGIA VERBI

LECTIO PRIMA

Deinde lector ad ambonem pergit, et legit primam lectionem, quam omnes sedentes auscultant.

Ad finem lectionis significandam, lector subdit: **Verbum Dómini.**

Omnes acclamant: **Deo grátias.**

PSALMUS

Psalmista, seu cantor, psalmus dicit, populo responsum proferente.

Postea, si habenda sit **SECUNDA LECTIO**, lector eam in ambone legit, ut supra.

Ad finem lectionis significandam, lector subdit: **Verbum Dómini.**

Omnes acclamant: **Deo grátias.**

Sequitur **Allelúia**, vel alter cantus.

Si vero non adest diaconus, sacerdos ante altare inclinatus secreto dicit:

**Munda cor meum ac lábia mea, omnípotens deus,
ut sanctum Evangélium tuum digne váleam nuntiáre.**

EVANGELIUM

Postea diaconus, vel sacerdos, ad ambonem pergit, ministris pro opportunitate cum incenso et cereis eum comitantibus, et dicit: **Dóminus vobíscum.**

Populus respondet: **Et cum spírítu tuo.**

Diaconus, vel sacerdos: **Léctio sancti Evangélii secúndum ...**
et interim signat librum et seipsum in fronte, ore et pectore.

Populus acclamat: **Glória tibi, Dómine.**

Finito Evangelio, diaconus, vel sacerdos dicit: **Verbum Dómini,**
omnibus acclamantibus: **Laus tibi, Christe.**

Deinde librum osculatur dicens secreto:

Per evangélica dicta deleántur nostra delícta.

HOMILIA

**Credo in unum Deum,
Patrem omnipoténtem, factórem caeli et terrae,
visibílium ómnium et invisibílium.
Et in unum Dóminum Jesum Christum,
Fílium Dei unigénitum,
et ex Patre natum ante ómnia sáecula.
Deum de Deo, lumen de lúmine, Deum verum de Deo vero,
génitum, non factum, consubstantiálem Patri:
per quem ómnia facta sunt.
Qui propter nos hómines et propter nostram salútem
descéndit de caelis.**

Ad verba quae sequuntur, usque ad factus est, omnes se inclinant.

**Et incarnátus est de Spírítu Sancto
ex María Vírgine, et homo factus est.
Crucifíxus étiam pro nobis sub Póntio Piláto;
passus et sepúltus est,
et resurréxit tértia die, secúndum Scriptúras,**

et ascéndit in caelum, sedet ad dexteram Patris.
Et iterum ventúrus est cum glória, iudicáre vivos et mórtuos,
cuius regni non erit finis.
Et in Spíritum Sanctum, Dóminum et vivificántem:
qui ex Patre Filióque procedit.
Qui cum Patre et Fílio, simul adorátur et conglorificátur:
qui locútus est per prophétas.
Et unam sanctam, cathólicam et apostólicam Ecclésiam.
Confíteor unum baptísma in remissionem peccatórum.
Et expécto resurrectionem mortuórum,
et vitam ventúri saeculi. Amen.

ORATIO UNIVERSALIS SEU ORATIO FIDELIUM

LITURGIA EUCHARISTICA

Sacerdos, stans ad altare, accipit patenam cum pane, eamque aliquantulum elevatam super altare tenet, secreto dicens:

**Benedíctus es, Dómine, Deus univérsi,
quia de tua largitáte accévimus panem,
quem tibi offérimus,
fructum terae et óperis mánuum hóminum,
ex quo nobis fiet panis vitae.**

Deinde deponit patenam cum pane super corporale.

Si vero cantus ad offertorium non peragitur, sacerdoti licet haec verba elata voce proferre; in fine populus acclamare potest:

Benedíctus Deus in saecula.

Diaconus, vel sacerdos, infundit vinum et parum aquae in calicem, dicens secreto:

**Per huius aquae et vini mystérium
eius efficiámur divinitátis consórtes,
qui humanitátis nostrae fieri dignátus est párticeps.**

Postea sacerdos accipit calicem, eumque aliquantulum elevatum super altare tenet, secreto dicens:

**Benedíctus es, Dómine, Deus univérsi,
quia de tua largitáte accévimus vinum,
quod tibi offérimus,
fructum vitis et óperis mánuum hóminum,
ex quo nobis fiet potus spiritális.**

Deinde calicem super corporale deponit.

Si vero cantus ad offertorium non peragitur, sacerdoti licet haec verba elata voce proferre;
in fine populus acclamare potest:

Benedíctus Deus in saecula.

Postea sacerdos, inclinatus, dicit secreto:

**In spírítu humilitátis et in ánimo contríto
suscipiámur a te, Dómine;
et sic fiat sacrificium nostrum in conspéctu tuo hódie,
ut pláceat tibi, Dómine Deus.**

Et, pro opportunitate, incensat oblata et altare. Postea vero diaconus vel minister incensat sacerdotem et populum.

Deinde sacerdos, stans ad latus altaris, lavat manus, dicens secreto:

**Lava me, Dómine, ab iniquitáte mea,
et a peccáto meo munda me.**

Stans postea in medio altaris, versus ad populum, extendens et iungens manus, dicit:

**Oráte, fratres:
ut meum ac vestrum sacrificium
acceptábile fiat apud Deum Patrem omnipoténtem.**

Populus respondet:

**Suscípiat Dóminus sacrificium de mánibus tuis
ad laudem et glóriam nóminis sui,
ad utilitátem quoque nostram
totiúsque Ecclésiae suae sanctae.**

ORATIO SUPER OBLATA

PREX EUCHARISTICA II

PRAEFATIO

Sacerdos, manus extendens, dicit: **Dóminus vobíscum.**

Populus respondet: **Et cum spírítu tuo.**

Sacerdos, manus elevans, prosequitur: **Sursum corda.**

Populus: **Habémus ad Dóminum.**

Sacerdos, manibus extensis, subdit: **Grátias agámus Dómino Deo nostro.**

Populus: **Dignum et iustum est.**

Sacerdos prosequitur prefationem manibus extensis:

Vere dignum et iustum est, aequum et salutáre,

**nos tibi, sancte Pater, semper et ubique grátias ágere
per Fílium dilectiónis tuae Jesum Christum,
Verbum tuum per quod cuncta fecísti:
quem misísti nobis Salvatórem et Redemptórem,
incarnátum de Spíritu Sancto et ex Vírgine natum.
Qui voluntátem tuam adímplens
et pópulum tibi sanctum acquírens
exténdit manus cum paterétur,
ut mortem sólveret et resurrectionem manifestáret.
Et ideo cum Angelis et omnibus Sanctis
glóriam praedicámus, una voce dicéntes:**

*In fine autem praefationis iungit manus et, una cum populo, ipsam praefationem
concludit, cantans vel clara voce dicens:*

**Sanctus, Sanctus, Sanctus Dóminus Deus Sábaoth.
Pleni sunt caeli et terra glória tua.
Hosánna in excélsis.
Benedíctus qui venit in nómine Dómini.
Hosánna in excélsis.**

Sacerdos, manibus extensis, dicit:

Vere Sanctus es, Dómine, fons omnis sanctitátis.

Iungit manus, easque expansas super oblata tenens, dicit:

**Haec ergo dona, quáesumus,
Spíritus tui rore sanctífica,**

iungit manus et signat semel super panem et calicem simul, dicens:

**ut nobis Corpus et + Sanquis fiant
Dómini nostri Jesu Christi.**

Iungit manus.

Qui cum Passióni voluntárie traderétur,

accipit panem, eumque parum elevatum super altare tenens, prosequitur:

**accépit panem et grátias agens fregit,
dedítque discípulis suis, dicens:**

parum se inclinat

ACCÍPITE ET MANDUCÁTE EX HOC OMNES:

HOC EST ENIM CORPUS MEUM,

QUOD PRO VOBIS TRADÉTUR.

Hostiam consecratam ostendit populo, reponit super patenam, et genuflexus adorat.

Postea prosequitur:

Símili modo, postquam cenátum est,

accipit calicem, eumque parum elevatum super altare tenens, prosequitur:

accípiens et cálicem,

íterum grátias agens dedit discípulis suis, dicens:

parum se inclinat

ACCÍPITE ET BÍBITE EX EO OMNES:

HIC EST ENIM CALIX SÁNGUINIS MEI

NOVI ET AETÉRNI TESTAMÉNTI,

QUI PRO VOBIS ET PRO MULTIS EFFUNDÉTUR

IN REMISSIÓNEM PECCATÓRUM.

HOC FÁCITE IN MEAM COMMÉMORATIÓNEM.

Calicem ostendit populo, deponit super corporale, et genuflexus adorat.

Deinde dicit: **Mystérium fidei:**

Et populus prosequitur, acclamans:

Mortem tuam annuntiámus, Dómine,

et tuam resurrectionem confitémur, donec vénias.

Deinde sacerdos, extensis manibus, dicit:

Mémores ígitur mortis et resurrectionis eius,

tibi, Dómine, panem vitae

et cálicem salutis offérimus,

grátias ágentes quia nos dignos habuísti

astáre coram te et tibi ministráre.

Et súpplíces deprecámur

ut Córporis et Sántuini Christi partícipes

a Spírítu Sancto congregémur in unum.

Recodáre, Dómine, Ecclésiæ tuæ toto orbe diffúsæ,

ut eam in caritaté perficias

una cum Papa nostro Benedicto et Epíscopo nostro Dominico

et univérso clero.

In Missis pro defunctis addi potest:

Meménto fámuli tui (fámulae tuæ) N.,

Quem (quam) ad te ex mundo vocásti.

Concéde, ut, qui (quæ) complantátus (complantáta)

Fuit similitúdini mortis Fílii tui,

Simul fiat et resurrectionis ipsíus.

Meménto étiam fratrum nostrórum,

**qui in spe resurrectionis dormiérunt,
omniúmque in tua miseratione defunctorum,
et eos in lumen vultus tui admítte.**

**Omnium nostrum, quáesumus, miserére,
ut cum beáta Dei Genetríce Vírgine María,
beátis Apóstolis et ómnibus Sanctis,
qui tibi a saéculo placuérunt,
aetérne vitae mereámur esse consórtes,
et te laudémus et glorificémus**

jungit manus

per Fílium Jesum Christum.

Accipit patenam cum hostia et calicem, et utrumque elevans, dicit:

**Per ipsum, et cum ipso, et in ipso,
est tibi Deo Patri omnipoténti,
in unitáte Spíritus Sancti,
omnis honor et glória
per ómnia saecula saeculórum.**

Populus acclamat: Amen.

RITUS COMMUNIONIS

Calice et patena depositis, sacerdos, iunctis manibus, dicit:

**Praecéptis salutáribus móniti,
et divína istitutióne formáti,
audémus dícere:**

Extendit manus et, una cum populo, pergit:

**Pater noster, qui es in caelis:
sanctificétur nomen tuum;
advéniat regnum tuum;
fiat volúntas tua, sicut in caelo, et in terra.
Panem nostrum cotidiánum da nobis hódie;
et dimítte nobis débita nostra,
sicut et nos dimíttimus debitóribus nostris;
et ne nos indúcas in tentatiónem;
sed líbera nos a malo.**

Manibus extensis, sacerdos solus prosequitur, dicens:

**Líbera nos, quáesumus, Dómine, ab ómnibus malis,
da propítius pacem in diébus nostris,**

**ut, ope misericórdiae tuae adiúti,
et a peccáto simus semper líberi
et ab omni pertubatióne secúri:
expectántes beátam spem
et advéntum Salvatóris nostri Jesu Christi.**

Iungit manus.

Populus orationem concludit, acclamans:

**Quia tuum est regnum,
et potéstas, et glória in sáecula.**

Deinde sacerdos, manibus extensis, clara voce dicit:

**Dómine Jesu Christe, qui dixísti Apóstolis tuis:
Pacem relínquo vobis, pacem meam do vobis:
ne respicias peccáta nostra,
sed fidem Ecclesiae tuae;
eámque secúndum voluntátem tuam
pacificáre et coadunáre dignéris.**

Iungit manus.

Qui vivis et regnas in sáecula saeculórum.

Populus respondet:

Amen.

Sacerdos, ad populum conversus, extendens et iungens manus:

Pax Dómini sit semper vobíscum.

Populus respondet:

Et cum spíritu tuo.

Deinde, pro opportunitate, diaconus, vel sacerdos, subiungit:

Offérte vobis pacem.

Deinde accipit hostiam eamque super patenam frangit, et particulam immittit in calicem, dicens secreto:

**Haec commíxtio Córporis et Sáanguinis Dómini nostri Jesu Christi fiat
accipiéntibus nobis in vitam aetérnam.**

Interim cantatur vel dicitur:

Agnus Dei, qui tollis peccáta mundi: miserére nobis.

Agnus Dei, qui tollis peccáta mundi: miserére nobis.

Agnus Dei, qui tollis peccáta mundi, dona nobis pacem.

Sacerdos deinde, manibus iunctis, dicit secreto:

**Dómine Jesu Christe, Fili Dei vivi,
qui ex voluntáte Patris,
cooperánte Spíritu Sancto,
per mortem tuam mundum vivificásti:
líbera me per hoc sacrosánctum Corpus et Sánguinem tuum
ab ómnibus iniquitátibus meis et univérsis malis:
et fac me tuis semper inhaerére mandátis,
et a te numquam separári permíttas.**

Vel:

**Percéptio Córporis et Sánguinis tui, Dómine Jesu Christe,
non mihi provéniat in iudícium et condemnatióem:
sed pro tua pietáte prosit mihi ad tutaméntum mentis et córporis,
et ad medélam percipiéndam.**

Sacerdos genuflectit, accipit hostiam, eamque aliquantulum elevatam super patenam tenens, ad populum versus, clara voce dicit:

**Ecce Agnus Dei, ecce qui tollit peccáta mundi.
Beáti qui ad cenam Agni vocáti sunt.**

Et una cum populo semel subdit:

**Dómine, non sum dignus, ut intres sub tectum meum,
sed tantum dic verbo,
et sanábitur ánima mea.**

Et sacerdos, ad altare versus, secreto dicit:

Corpus Christi custódiat me in vitam aetérnam.

Et reverenter sumit Corpus Christi.

Deinde accipit calicem et secreto dicit:

Sanguis Christi custódiat me in vitam aetérnam.

Et reverenter sumit Sanguinem Christi.

Postea accipit patenam vel pyxidem, accedit ad communicandos, et hostiam parum elevatam unicuique eorum ostendit, dicens: Corpus Christi.

Communicandus respondet: Amen. Et communicatur.

Dum purificationem peragit, sacerdos dicit secreto:

**Quod ore sumpsimus, Dómine, pura mente capiámus,
et de múnere temporáli fiat nobis remédiu(m) sempitérnum.**

POSTCOMMUNIO

Deinde, stans ad sedem vel ad altare, sacerdos dicit:

Orémus...

Populus in fine acclamat: **Amen.**

RITUS CONCLUSIONIS

Deinde fit dimissio. Sacerdos, versus ad populum, extendens manus, dicit:

Dóminus vobíscum.

Populus respondet: **Et cum spírítu tuo.**

Sacerdos benedicit populum, dicens:

Benedícat vos omnípotens Deus

Pater, et Fílius, + et Spírítus Sanctus.

Populus respondet: **Amen.**

Deinde diaconus, vel ipse sacerdos, manibus iunctis, ad populum versus dicit:

Ite, missa est.

Populus respondet: **Deo grátias.**